

Cruz Cora Aruba ta lanza jingle!



DESPUES di 3 luna den suspenso, Cruz Cora Aruba a lanza su prome jingle. E jingle aki tin como meta pa yega na mas voluntario pa e organizacion. E pueblo di Aruba tin musica den curazon y cu e jingle aki, Cruz Cora ta spera di yega na e curazon di cada persona. Pesey tambe, a scohe dos programa di Carnaval hopi scucha na Aruba, pa lanza e jingle aki.

Indra Anthony-Pereira (Marketing & Operations), Minerva Huizinga (Administracion) y Jedrick Perez (voluntario) acompaña pa e talento tras di e jingle, Robert Jeandor a bishita Ivo Yanez na Canal 90 y aki a laga Aruba scucha e jingle pa prome biaha. Cu hopi orguyo e grupo a conta un tiki mas di e produccion y su meta. Na pregunta di Ivo di pakico bira un voluntario, Jedrick Perez a contesta: “E ta un satisfaccion grandi ora bo yuda un hende y sa cu bo a yuda cambia su bida”.

Despues di esaki, a sigui pa un bishita na Ruben Garcia y Aki Aya! Ruben a puntra Indra kico ta e rekisitonan pa bira un voluntario. “Un curazon grandi” e’la contesta y a splica un tiki, cu tur hende por yuda di un manera of otro.

Aki Robert Jeandor a conta Ruben y oyentenan cu e jingle aki e ta dedica na su defunto tata, Francisco Reinier Jeandor, cu den pasado tabata forma parti di Cruz Cora Aruba.

Cruz Cora a gradici tur hende cu a haci e jingle aki posibel y a haci un peticion na tur hende cu di un manera of otro por yuda expone e jingle aki, pa tuma contacto libremente via info@redcrossaruba.com of tel. 582-2219.